

## San Giuseppi

San Giuseppi sposu di Maria,  
patri putativu di Gesù,  
nni 'sta terra, tutti trì,  
furmaru la Sacra Famiglia.  
Nasci a Betlemmi e muri a Israeli.  
Fu vineratu di la chesa  
Cattolica e Ortodossa.

San Giuseppi lu falignami  
cu ascia, serra e martidduzzu  
travagliava iornu e notti  
pi guadagnàrisi lu panuzzu.

Soccu cci capitava faciva,  
senza chi ma si stancava,  
a Gesù lu misteri cci 'mparava.

Lu diciannovi Marzu è la so festa,  
pi l'occasioni cci priparamu  
tavulati chini di tanti pietanzi,  
li damu a manciari a li Virgineddi  
fimmini e masculi nicareddi e beddi.

Cu li casdaruna fora, mentri ardi  
lu focu di sutta, fimmini e òmini,  
pripàranu 'na gran minestra  
cu 'na pala sempri a rimirari  
pi lu preparatu nun fari appigliari.

Ricca di pasta, risu,  
maccu di favi, ogliu,  
sali e finuccheddi  
cu vròcculi e sparaceddi.

'Un nna va mancari la cipuddetta suffritta  
nill'ogliu e 'na pizzicata  
di spèzzii pi dàricci cchiù sapuri.  
tuttu cottu cu tantu amuri.

Senza scurdàrinni di la pasta  
cu la muddica fritta a duviri  
nni la padedda  
cu zzùccaru e cannedda.

A San Giuseppi  
cci facemu 'na gran Straula,  
gata quantu un palazzu  
china di addàuru e purciddatèddi  
la purtamu 'ngiru pi lu paisi,

cu appressu tutti li Rivilisi.

San Giuseppi misu nni la vara,  
arriccutu di tanti nastri culurati,  
sordi, oru e tanti sciuri,  
lu purtamu 'nprucissioni  
prigannulu pi quarchi purmisioni.

Ogni annu cci facemu na gran festa,  
lu scopu di 'sta tradizionii è:  
pi li picciotti nun si la scurdari  
e pi li granni falla cuntinuari.

Tutti natri fideli, nichì  
e granni, fimmini e òmini,  
semu grati a l'organizzazione  
ringrazziannu tutti li Guvirnatura.

2013 Giuseppe Cardella